

Epesu

Pauru remikusiwarerà Epesu wānà kō pè maekwerà

Imovyvya

Aã kareta Janejare'e 'Āg omotekokuwa Pauru tokusiwa Jesu koty rewarà kō Epesu taa wānà kō pè maekwerà. Pauru oo oo Janejare'e ayvu e'ey mojenu iko remē, Epesu taa pè teve omojenu erokwa. A'evo ekoi remē jane kō mō ojirovija ypy Jesu rē (J.K.R. 19—20). A'e taa pè Pauru opyta puku rā'ī imotekokuwa kō iko. Āmē ajaire ojisyry oo paire, omotekokuwa kō jē imokasi kō wemikusiwarerà rupi toiko. Jimopā'āga pè tui remē tē kareta okusiwa ijupe kō imonooka. Epesu wānà kō Janejare'e ayvu rupi katu ekoi ipi. Nojavyi kupa ipi. Nopoi teve iwyi kupa ipi. Na'evoi amō taa wānà kō Jesu koty rewarà kō amē. Ajawyi Pauru oryvay iko Epesu wānà kō rē ipi. Kee e'i ikusiwa: “Janejare'e tē okatuaya rupi janerereko katu, Jesu Kiristu rē jairovija jaiko remē. Janejare'e remime'ēgwerà tē janerereko katua, āwisō kee taoty e'ā: 'Ivo katu aiko rewarà mō tē erereko katu', taoty e'ā”, e'i (Eps. 2.8-9).

Āmō, “Ajawyi age'e remē, jajimory katu ojee ky'y, ojirovija ee mē kō rōmō, pē'īpyte mē'ē rōmō janemoaty opyri rewarà mō”, e'i (Eps. 2.14).

Āmō, kee e'i: “Janerekoa ipyau mē'ē ome'ē janeupe ky'y. Janemojimo'yoka Kiristu rē janerereko ky'y. Ajawyi āwitō jamānō mē'ē vo 'ejē Janejare'e pè janeaiwererà rewarà mō jaiko mijā. Aekwery vo rōwā jaiko ky'y”, e'i (Eps. 2.5).

Āmō, kee e'i: “Ājāgai rōvijā opota tē janemoripe janereity ipi, Janerōvijā ywete tijarovija e'ā ipi”, e'i (Eps. 6.11). Ajawyi jajimokasi amātejē Janejare'e remime'ēgwerà pè janemokasia mō ipi. Aepo e'i ikusiwa Pauru kareta rē imonooka.

Pauru ojikuwa ijupe kō

1 Ije Pauru, aã kareta akusiwa ajupa. Kiristu Jesu tē itōkō emonooka wayvukwerà mojenuarà rōmō taiko. Janejare'e remimota rupi a'evo aiko ipi. Aã kareta akusiwa pejē ajupa, Epesu taa

wānà kō pè, Janejare'e rē pejirovija katu mǎe kō pè, Kiristu Jesu revejē peiko mǎe kō pè.^a

²Janeruwasu ikō tapenereko katuay okatuaya rupi nē. Tapepy'amopiryvypy katu teve ikō ipi nē. Āmō, Janerōvijā Jesu Kiristu teve ikō ta'evo penereko nē.

“Janejare'e simoe'e”, e'i mǎē

³Janejare'e janemojimo'yokapa Wa'yry Kiristu rē, eeejē tijaiko. A'e itōkō oēma oo yva pupe. Aja rewarā mō eeejē yva pupe jaiko maevo sō tite Janejare'e pè. Āmō, moma'e e'ekweray Janejare'e o'Āg pupe omojikuwaoka janeupe. Iteetejē werekooka janeupe, owaray tijaiko āmē. Ajawyi Janejare'e ywesō simoe'e ipi, Janerōvijā Jesu Kiristu Ruu. ⁴Yvy jinō e'āve janepyteporo amātejē oupewarā kō rōmō tijaiko. A'evoa rōmō Kiristu rē janemojimo'y janerereko, eeejē tijaiko. Ajawyi javāe ovake remē, kee e'itā janere omājā: “Aje, epy'a rupi katuwarā kō tē pejē”, e'itā. “Ivo katu mǎē rōmō tē pejē”, e'itā janere omājā āmē. Nivoi mǎē jē rōwā omo'ytā janere āmē ky'y, Kiristu revejē jaiko mǎe kō rōmō. A'evoa rōmō janepyteporo amātejē karamoeve. ⁵Janerauvay teāmā karamoe remeve. Ajawyi kee e'ipa amātejē janeupewarā mō: “Apota eākarāgwerā kō rōmō areko kō”, e'ipa jane. “Ajawyi Jesu Kiristu amonookatā ikoty kō tomānō ekovijarerā kō rōmō, ijaiwererā kō repykarā mō. A'evo areko kōtā eākarāgwerā kō rōmō toiko kupa”, e'ipa Janejare'e karamoe remeve janeupe. ⁶Wa'yry wauvay Janejare'e. Ajawyi janemoje'arī Wa'yry revejē janerauvay janerereko ipi. A'evoa rē simoe'e ywete ipi.

⁷Omānō janerekovijarerā rōmō remē, Kiristu janerekyi nivoi tekoua wryy kyty wyi, Uu kyty janererojivy ky'y. “Awyjepa” e'ipa Janejare'e janeaiwererā pè āmē ky'y. Aje janerauvay wete Janejare'e.^b ⁸Ajawyi tē age'e remē ikatuay janerereko ky'y. Okatuaya rupi a'evo janerereko. Wemikuwa rupi a'evo janerereko. Otekokuwavy Janejare'e. ⁹Karamoe remē Janejare'e e'ipa amātejē manyvotā janerereko, Kiristu revejē jaiko mǎe kō rōmō tijaiko. Ikatuay wete janerereko ipi. A'evoa rā nomojikuwaokaive jane kō pè karamoe remē. Age'e si omojikuwaoka janeupe ky'y, otekokuwavya rupi. ¹⁰Kee e'ipa amātejē: “Ereminōgwerā kō pirujē Era'yry wryy kyty ainōtā”, e'ipa amātejē Janejare'e. “Āwitō yvapewarā kō iwryy kyty ainōtā, āwīvo vetā yvy pewarā kō areko”, e'ipa. Janejare'e tē e'i manyvo 'arā remē tē a'evoa oinōtā. Āmē tē pirujē weminōgwerā kō omoatyokatā Kiristu wryy kytywarā kō rōmō toiko ky'y.

¹¹Karamoe remeve Janejare'e kee e'ipa janeupewarā mō, “Ekoty rewarā kō rōmō toiko kupa, Era'yry revejē ekoi mǎe kō rōmō”, e'ipa janeupe. Aepe e'ipa janeupewarā mō karamoeve. A'e rā rōmō tē janereinō.

^a 1.1 J.K.R. 18.19-21; 19.1 ^b 1.7 Krs. 1.14

Wemimota rupi katu tè a'evo janerereko. Ekoa tè a'evo ekoi ipi. ¹²Ore ypy Juteu kō rōmō orojirovija Kiristu rè. A'evoa rōmō orepyteporo, āwisō ikatuaya moe'earà rōmō toroiko ky'y.

¹³Aje ywete Janejare'e ayvu e'eay Jesu rewarà. A'e ojenu ypy pejë remē itōkō, “aje ywete” pejë ijupe enu. Kiristu rè pejirovija āmē peiko ky'y. A'evo Janejare'e penereko katu oupewarà kō rōmō āmē penereko. Ajawyi o'Āg oinō pepy'a pupe wayvukwerà rupi katu. A'e pupe okoty rewarà kō rōmō pemosā'āga penereko. ¹⁴O'Āg oinōma janepy'a pupe. Ajaa rupi kee jaa omojikuwaoka jane: “Eākarāgwerà rōmō tè peiko ky'y. Ajawyi e'Āg tē tesō ainōma pepy'a pupe. Aje ywete kāramō poroekyitā peneraa erena ywe'e kyty awyje tapeiko karuaru epyri”, ejaa omojikuwaoka jane. Āmē ywesō ikatuaytà jaiko āmē ky'y. Ajawyi simoe'e ywetetā Janejare'e, ikatuay wete janerereko rewarà mō.

“Janejare'e pè aporegeta peupewarà mō ipi”, e'i mā'ē

¹⁵Jypy remē kee jaa ojenu ije penewarà: “Ojirovija katu Janerōvijā Jesu rè kupa”, ejaa ojenu ije. Āmō, “Wauvay pirujē Jesu koty rewarà kō kupa ipi”, ejaa ojenu teve ije. ¹⁶Eroryvay aepo aenu remē. Amoe'e ywete Janejare'e penewarà mō āmē aiko ipi. Napi tesō Janejare'e moe'e peupewarà mō aiko ipi. Āmō, “Ereko katu kō, Papa”, a'e peupewarà mō ipi. ¹⁷Kee a'e teve peupewarà mō: “Emotekokuwaway kō ikō ne'Āg rupi nē, Papa”, a'e peupewarà mō ipi. “Āmē ywesō nekuwa katutā kupa, ne'Āg tè nemojikuwaokatā ijupe kō rewarà mō”, a'e peupewarà mō. Janerōvijā Jesu Kiristu Ruu pè aepo a'e, a'e ywesō ikasiay mā'ē pè.

¹⁸Kee a'e teve peupewarà mō: “Epy'amotekokuwa kō ikō ereko nē, āmē ywesō nerekoa aje ywete mā'ē tokuwa katu kupa. Tokuwa amātejē teve manyvotā tekoua kāramō nerena pè oroiko mā'ē”, a'e peupewarà mō, āwisō a'evoa rā rōmō pepyteporo amātejē. Āmō, “Ikatuaytà pirujē nekoty rewarà kō nemoatypa nerena pè nepyri remē. A'evoa rā rè emotekokuwa kō tokuwa amātejē kupa”, a'e peupewarà mō ipi. ¹⁹Kee a'e teve peupewarà mō: “Emotekokuwa kō nekasia tokuwa kupa, kejavōigā mā'ē rōwā nekasia rewarà mō”, a'e peupewarà mō Janejare'e pè. Aje, ikasiay wete Janejare'e kasia. Okasia rupi sitō janerereko jajirovija ee mē kō rōmō. ²⁰Okasia rupi sitō Kiristu omomoeraoka omānō maire toiko mijē. [Ajawyi teāgwerà vo rōwā ekoi ky'y.] Ajaire o'ekatu kyty omoapyoka wena yva pè, weeve Jōvijā wasu rōmō toiko ky'y. Okasia rupi teve a'evo wereko. ²¹Ijayvukasiay wete Kiristu āmē ky'y. A'e ywesō ijayvukasiay wete mā'ē rōmō ekoi. Pirujē yvapewarà rōvijā kō 'arà kyty ekoi. Pirujē ija mē kō 'arà kyty teve ekoi. Age'e remē nuvei 'ete āmō ywesō ijayvukasi Jesu wyi mā'ē. Nuvei 'ete wete mijēsi! Āwīvo ve kāramō nuvei'āi teve Jesu 'arà kyty ekoi mā'ē mō.

“Kiristu ro'o tē jane ky'y”, e'i mǎē

²² Janejare'e omojōvijā wasu wetepa Kiristu, pirujē moma'e kō 'arà kyty toiko ky'y. Pirujē ojirovija ee mǎe kō Rōvijā wasu rōmō ekoi teve ky'y. Ajawyi ikatuay jane ky'y, ikoty rewarà kō rōmō jaiko. ²³ Jane'y tē Kiristu. Kiristu pirà vo tē jaiko ky'y. Okasia pupe janeroupaoka ky'y. Pirujē weminōgwerà kō ooupa. Mape jē rōwā na'evoi wereko kō. Yva pē ekoi teve. Yvy pē ekoi teve. A'evoa rē sitō apota tapejimotekokuwavay peiko ipi.^c

“Opoera mǎē vo 'ejē jaiko Janejare'e kasia rupi ky'y”, e'i mǎē

2 ¹ Jypy remē itōkō teāgwerà vo 'ejē peiko mijā. Peaiwererà rewarà mō a'evō peiko mijā. Janejare'e rekoa rupi napeikoi rewarà mō a'evō peiko mijā. ² Peaiwererà rupi kōrijō tē peiko ipi mijā. Āwitō age'e remēwarà Janejare'e rekoa rupi noikoi mǎe kō, āwīvo pejē peiko mijā. Ājāgai rōvijā rekoa rupi kōrijō tē peiko mijā. Āwitō pirujē ija mǎe kō 'arà kyty ājāgai rōvijā ekoi, āwīvo ve Janejare'e rekoa noerovijai mǎe kō 'arà kyty ekoi. ³ Āwī kō voay wete jaiko mijā. Pirujē a'evō jaiko teāmā. Janereko aiwerà rupi kōrijō tē jaiko mijā. Janeremimota aiwerà rupi kōrijō teve jaiko mijā. Janejipy'amogeta ai kō rupi jaiko mijā. Ajawyi Janejare'e remimomorijau rā rōmō teāmā jaiko mijā.

⁴ Ajamā'ē a'evō ipe jaiko remē, Janejare'e janerauvay jē janerereko. Janeporijauesa ywete jē teve janerereko. ⁵ Ajawyi janerekoa ipyau mǎē ome'ē janeupe ky'y. Janemojimo'yoka Kiristu rē janerereko ky'y. Ajawyi āwitō jamānō mǎē vo 'ejē Janejare'e pē janeaiwererà rewarà mō jaiko mijā. Aekwery vo rōwā jaiko ky'y. Japoerapa ky'y, Kiristu revejē jaiko mǎe kō rōmō. A'evō Janejare'e janerereko katu ky'y, janerauvay rewarà mō.^d ⁶ Awyje katu Janejare'e omomoera Kiristu remē, eevejē janemomoera ky'y. Āwitō Kiristu Jesu yva pē tui upa age'e, āwīvo ve jane eevejē jaiko maevo sō tite ky'y. ⁷ Janejare'e opota janeporijauesa ywetea mojikuwaoka amātejē janeupe, āwisō nisikuwapa'āi imomewa remē. Kiristu Jesu rupi janerauvaya omojisaoka janeupe ipi.

⁸⁻⁹ Manyvo nijareko kuwa'āi janevote jajireko katu rōmō. Janejare'e tē okatuaya rupi janerereko katu, Jesu Kiristu rē jajirovija jaiko remē. Janejare'e remime'ēgwerà tē janerereko katua, āwisō kee taoty e'ā: “Ivo katu aiko rewarà mō tē erereko katu”, taoty e'ā. ¹⁰ Janejare'e reminōgwerà tē jane. Kiristu Jesu revejē janerereko, wemimota rupi katu tijaiko, Janejare'e “ta'evō” e'ipa amātejē maekwerà rupi katu tijaiko.

“Pe'īypyte rōmō jaiko Kiristu koty rewarà kō rōmō ky'y”, e'i mǎē

¹¹ Kee a'e pejē. Ore Juteu kō rōmō oroiko teāmā, a'e rā mō teāmā oresaky rewarà mō. Pejē amē Juteu rōwā mǎe kō tē pejē amē. Ajawyi

^c 1.23 Krs. 1.18 ^d 2.5 Krs. 2.13

nijajimoryi ojee jaiko mijã. “Ãmõ kõ” oro'e tẽ pejẽ mijã. “Nojimosĩpire'oi mãe kõ tẽ ãwĩ kõ”, oro'e pejẽ mijã. “Janejare'e ãkarãgwerà kõ rõwã ãwĩ kõ”, jaa tẽ aepe oro'e pejẽ mijã.^e Ajawyi kee a'e pejẽ. Tapenearaipa e'ã manyvo peiko maekwerà wyi, a'e pejẽ. [Kee tapejẽ ywe'e tite e'ã: “Ekatua rupi tẽ itõkõ Janejare'e erereko katu”, tapejẽ ywe'e tite e'ã.]¹² Aje itõkõ Kiristu reve napeikoi mijã. Janejare'e remipyteporokwerà rõmõ rõwã peiko mijã, Isaeu jeapyrerà kõ rõwã tẽ pejẽ rewarà mõ. Orerãmõi kõ pẽ tẽ itõkõ wayvu omojikuwaokapa karamoe remẽ. Kee e'i itõkõ orerãmõi kõ pẽ: “Ekoty rewarà rã kõ tẽ pejẽ. Ajawyi epyri poroereko katutã”, e'i. Isaeu kõ pẽ kõrijõ tẽ aepe e'i mijã. Aepe ne'i pejẽ mijã. Ajawyi Janejare'e pyri napeiko kuwa'ãi mijã. Napekuwai Janejare'e opota penereko katu mijã. Ajawyi sitõ Janejare'e e'ãte peiko mijã, Isaeu kõ rõwã tẽ pejẽ rewarà mõ.

¹³ A'evo ke'irõwã peiko maevo sõ tite Janejare'e wyi mijã. Ajamãẽ Kiristu Jesu peneru Janejare'e pyri'ĩje'ẽ tapeiko ky'y. Omãñõa rupi a'evo penereko, pejirovija ee remẽ. ¹⁴ Kiristu tẽ janemoaty pirujẽ Janejare'e pewarà kõ rõmõ tijaiko ky'y. ãwitõ Juteu kõ, ãwivo ve Juteu rõwã mãe kõ ky'y. Karamoe remẽ oreremisa tare'ã rõmõ tẽ peiko ipi mijã, Juteu kõ rõwã tẽ pejẽ rewarà mõ. Pejẽ teve noreresa tari pekupa ipi mijã. Ajamãẽ Kiristu a'evo maekwerà omoje'opa janewyi ky'y. Ajawyi age'e remẽ, jajimory katu ojee ky'y, ojirovija ee mãe kõ rõmõ, pe'ĩpyte mãẽ rõmõ janemoaty opyri rewarà mõ.

¹⁵ Nikasi orerãmõi kõ rekoawerà oreupe ky'y, kee eu mã'ẽ: “Juteu kõ nojimoryi ãmõ kõ rẽ ipi”, eu mã'ẽ nikasi oreupe ky'y. Aepe jaa rupi nijaikoi ky'y, Kiristu omãñõa rupi omoje'opa ãwĩ rapijarà ky'y rewarà mõ. Pe'ĩpyte rõmõ janereinõ ky'y, okoty rewarà kõ rõmõ tijaiko. Ajawyi “ãmõ tẽ ãwĩ” nija'ei ojiupe ky'y. “Eretãrã” ja'e ojiupe ky'y.^f ¹⁶ Yvyra jipokana rẽ Kiristu omãñõ mã'ẽ rupi janererojivy Janejare'e kyty, opyri tijaiko ky'y. ãwitõ orereru Juteu kõ rõmõ, ãwivo ve peneru Juteu rõwã mãe kõ rõmõ. A'evo remẽ janemojimoryoka jẽ ojee ky'y, Kiristu koty rewarà kõ rõmõ. Pe'ĩpyte rõmõ jaiko ky'y.^g ¹⁷ A'evõa rõmõ Kiristu uu ike yvy kyty ojimojane. Kee e'i imojenu: “Janejare'e penerekotã opyri ky'y”, e'i imojenu. Peupe aepe e'i, ke'irõwã Janejare'e wyi peiko mãe kõ rõmõ. Oreupe teve e'i, ipyri sa'u oroiko mãe kõ pẽ ve. ¹⁸ Ojevo jẽ janererojivy Janejare'e pyri'ĩje'ẽ tijaiko ky'y. Janejare'e 'Ãg pe'ĩte. A'e rupi javãe kuwa Janejare'e pyri ky'y.

“Janejare'e 'Ãg rena rõmõ jaiko ky'y”, e'i mã'ẽ

¹⁹ Ajawyi Janejare'e pyriwarà kõ tẽ pejẽ ky'y. “Ãmõ kõ tẽ” ne'i pejẽ ky'y. “Eãkarã kõ tẽ” e'i pejẽ ky'y. ²⁰ Pe'ĩpyte rõmõ jaiko ãmẽ ky'y, Janejare'e

e 2.11 Wãmõi kõ rekoawerà rupi a'evo Juteu kõ ekoi ipi mijã. Ajawyi ojimoe'e ywete wemosĩpire'owarã rẽ kupa ipi. Ajamã'ẽ opirà rova'arã kõrijõ omotee ojimosĩpire'oa rupi kupa ipi. Ajamã'ẽ opy'a kõ sãmẽ, nomotee'ãi kuwa kupa. f 2.15 Krs. 2.14 g 2.16 Krs. 1.20

koty rewarà kō rōmō jaiko. Tetã rē tē poromosã'āgatà tapekuwa sa'u. Kytaypy vo Kiristu Jesu. A'e ywesō janemokasi Janejare'e pyriwarà kō rōmō. A'e kōrijō tē rōwã janemokasi ajamã'ē. Kiristu remimonokwerà kō ve janemokasi. A'e kō ãmē tetã yta kō vo. A'e kō mārãkuwaa rē janemotekokuwa janemokasi wemikusiwarerà rupi. Kiristu rē jirovija mã'ē rē janemokasi. ãmō, Janejare'e ayvu mojenuarerà kō teve a'evo ekoi. Ijyta kō vo teve.^h Kiristu ywesō janemotekokuwa janemokasi ajamã'ē. Jane ãmē ijãrokã kō vo. Oviro vo teve jane jaiko. ²¹⁻²² Kiristu tē janemoaty janemomãatã pe'ÿpyte rōmō tijaiko, Janejare'e pewartã kō rōmō. ãwitō tetã jamõ'ã remē, ãwivo pe'ÿ tetã mã'ē vo janereinō. Ojeeve Janejare'e moe'ea retã vo janereinō janerereko, i'ãg rena rōmō tijaiko.

“Juteu rōwã mãe kō pewartã mō aposiko”, e'i mã'ē

3 ¹Aje ywete Janejare'e pe'ÿpyte rōmō janereinō. Ajawyi aporegeta Janejare'e pē peupewartã mō aiko ipi, ike jimopã'āga pupe aju remē. Kiristu Jesu ayvu amojenu peupe rewarà mō emopã'ã kupa. ²Janejare'e itōkō epyteporo emono wayvu tamojenu peupe, Juteu rōwã mãe kō rōmō. Okatuaya rupi epyteporo emono peupewartã mō taposiko. ³[ãwisō Juteu rōwã mãe kō teipe pejë remē. Ajamã'ē Janejare'e penereko jē oupewartã kō rōmō Kiristu rē pejirovija remē.] A'evoa Janejare'e nomojikuwaokaive mijã. Age'e remē tē katu omojikuwaoka janeupe ky'y. Eupe tē omojikuwapa, ãwisō toporomotekokuwa ee aiko ky'y. ⁴A'evoa pe'ÿpe'ÿ akusiwapa peupe ajupa. Pemogeta eremikusiwarerà remē, pekuwatã Kiristu rewarà eupe omojikuwaoka maekwerà. ⁵A'evoa rewarà nojikuwaive karamoe remē mijã. Tãmō kō ve nokuwaive mijã. Age'e tē katu Janejare'e omojikuwaokapa jane kō pē ky'y, o'ãg rupi. Jesu remimonokwerà kō pē teãmã omojikuwaoka tomojenu kupa. ãmō, wayvu mojenuarã kō pē ve omojikuwaoka. ⁶Kee jaa omojikuwaoka ijupe kō wayvu katuay tomojenu kupa: ãwitō Janejare'e orerereko katu Juteu kō rōmō, Kiristu Jesu rē orojirovija oroiko remē. ãwivo ve penereko katu ky'y, Kiristu Jesu rē pejirovija peiko remē. Pe'ÿpyte rōmō janereinō, ojiëtarã kō rōmō tijaiko ky'y. Kee e'ipa Janejare'e amãtejē: “Owaray arekotã Kiristu Jesu koty rewarà kō”, e'ipa. Aekwerà rupi katu janererekotã ãmē. Ojevo jē janererekotã. Aepo jaa nojikuwai mijã. Age'e remē tē ojikuwa janeupe ky'y.ⁱ

⁷Janejare'e tē itōkō epyteporo wemigwai rōmō. “Ekwa Jesu Kiristu rewarà mojenu Juteu rōwã mãe kō pē erokwa”, e'i itōkō ije. A'evoa rōmō emokasi okasia rupi emono. Ivo katu aiko rewarà mō rōwã epyteporo emono. [Nivoi aiko ipe remē epyteporo jē emono]. Okatuaya rupi

^h 2.20 A'e kō Kiristu rewarà rã okusiwa amãtejē maekwerà rupi janemotekokuwa.

ⁱ 3.6 Krs. 1.26-27

tè epyteporo emono. ⁸“Janejare'e koty rewarà kō wryy kytygà aiko, pirujē”, a'e ajipy'amogeta ipi. Ajamãẽ Janejare'e epyteporo jē tesō emono okatuaya rupi. Ajawyi amojenu jenu Kiristu katuay wetea Juteu rōwã mãe kō pè erokwa ipi, ãwisō nisikuwapa'ãi ikatuay wetea imomewa remē. ⁹Ãmō, janererekoa Janejare'e nomojikuwaokari jane kō pè mijã maekwerà amojenu jenu imojikuwa erokwa ky'y.

Janereinōgarerà tè aepo mojenuarà rōmō emono. Pirujē moma'e kō reinōgarerà tè a'e. Wekoa rã nomojikuwaokaive karamoe remē mijã. ¹⁰Age'e remē tè katu omojikuwaoka jane kō pè ky'y. ãwivo Jesu koty rewarà kō ojiētārã rōmō ekoi ky'y. Jesu Kiristu rupi tè a'evō jaiko ky'y. Ajawyi janemoatya rè yvapewarà kō omãẽ remē, Janejare'e omoe'e ywetetã janere omãjã kupa.

– Haa! Otekokuwaway Janejare'e, e'itã yvapewarà kō janere omãjã. Iteetejē itekokuwaa! e'itã kupa.

Yvapewarà kō rōvijã kō ve aepo e'itã.

¹¹Janejare'e a'evō rã rè oja'apa amãtejē karamoe remeve. Wayvu rupi katu a'evō ekoi. Janerōvijã Kiristu Jesu rupi a'evō janerereko. ¹²Ajawyi Janejare'e reve jaiko ky'y. Kiristu tè janereraa Uu pyri okoty rewarà kō rōmō tijaiko, jajirovija ee remē. Ajawyi Janejare'e ipiryvypy katu janere ky'y. Opoata katu japoregeta ijupe ipi. Tijasĩ e'ã japoregeta ijupe ãmē ipi. Tijakyje e'ã teve iwyi ipi.

¹³Ajawyi kee a'e pejē. Tapejimopirai e'ã ikō emopã'ã kupa remē nē, a'e pejē. Kee tapejē e'ã: “Janerewarà mō ojimomorijau upa”, tapejē e'ã ikō pejimopirai rōmō ije nē. Tapejimokasi jē ãmē peiko, poroauvay aiko rewarà mō. Ajawyi Janejare'e tapemoe'e jē agyvo erereko kupa remē.

“Janerauvay Jesu Kiristu”, e'i mãẽ

¹⁴Ajawyi ajimoenãpa'ã Janejare'e rovake aporegeta peupewarà mō ipi. ¹⁵A'e tè janererã oinō janere mãẽ rōmō ekoi. Pirujē yvapewarà kō ve weenō. Yvy pewarà kō ve weenō. A'e rovake ajimoenãpa'ã aporegeta peupewarà mō ipi. ¹⁶Kee a'e ijupe:

– Papa! Ikatuay orerereko mãẽ tè ene! Nekatuay mãẽ tè ene! Ne'ãg rupi epy'amokasi Epesu wãnã kō, neupewarà kō rōmō. ãmē ywesō tojimomãatã jē nere ojirovija nekasia rupi kupa, a'e ijupe peupewarà mō. ¹⁷Ãmō, Kiristu topy'aporakapa kō okasia rupi ereko kō ojirovija ee kō rōmō, a'e peupewarà mō ipi. ãmō, toporoauvay ikō iko kupa nē, a'e peupewarà mō Janejare'e pè.

¹⁸Aje, Kiristu janerauvay ipi. Nijamosã'ãgapa'ãi 'ete janerauvaya ipi. Ajawyi aepo a'e ijupe peupewarà mō ipi. ãmō, kee a'e teve ijupe peupewarà mō ipi. Peupewarà mō kōrijō tè rōwã ajamãẽ a'e ipi. Pirujē Janejare'e pyriwarã kō pewarà mō teve kee a'e ijupe:

– Emotekokuwa kō tokuwa wauvaya mosã'ãga kupa, ãwisō nokuwapa'ãi kupa remē. A'evō remē, kee te'i kupa: “Haa! Kiristu nopi'ãi erauvaya wyi

ipi”, te'i kupa, a'e ijupe. ¹⁹Norokuwapa'āi epe orerauvaya ipi. Ajamã'ê Epesu wānà kō tokuwa jē wauvaya, a'e ijupe. Kee e'itā āmē kupa: “Haa! Imorya rōmō taiko ajawy! Āwitō Janejare'e ikatuay wete, tāwīvo ve aiko”, e'itā āmē kupa, a'e Janejare'e pè peupewarà mō ipi.

²⁰Janerereko katua rē japoregeta ijupe ipi remē, ja'e māl'ē wyi wete janerereko katuay wete ipi. Okasia rupi tē a'evo janerereko ipi. ²¹Ajawy a'e ywesō ikō simoe'e ipi nē, Jesu koty rewarà kō atyry rōmō ipi nē! a'e ijupe. Kiristu Jesu revejē simoe'e ywete ipi. Ōō, awyje katu āwīvo jamoe'e karuaru ipi, tija'e.

“Pe'itypyte rōmō jaiko”, e'i māl'ē

4 ¹Temimopā'āgwerà tē ije, Janerōvijā ywete ayvu amojenu erokwa ipi rewarà mō. Kee a'e eayvukasi rōmō pejē. Janejare'e pepyteporopa okoty rewarà kō rōmō tapeiko. Ajawy emimota rupi ikō tapeiko ipi nē, a'e pejē. Āwitō Janejare'e ikatuay ekoi, a'e reruparà mō tapeiko. ²Tapejimoe'e tite e'ā peiko ipi, a'e teve pejē. “Ije ywesō”, tapejē ywe'e tite e'ā ojiupe ipi. Ikatusa rupi ikō peiko ipi nē. Tapejikōtevē e'ā ikō poromogeta remē nē, pevo rōwā ipe ekoi kupa remē. Ojevo jē ikō tapejiauvay peiko ipi nē.^j ³Janejare'e Āg tē pe'itypyte janereinō. Ajawy tapejimokasi jē ikō ojee owaray tapeiko ipi nē. ⁴Jane'y tē Jesu. Pe'ite ekoi. Ajawy pe'itypyte rōmō jaiko eeve. Janejare'e o'Āg omuu janeupe, janepy'a pupe tojimoena ky'y. Pe'ite i'Āg janepy'a pè ekoi māl'ē. Āwīvo ve janepyteporo ojevo jē janereraatā opyri tijaiko karuaru, ojevo jē. Pe'ite simoa'u jakupa māl'ē rōmō jaiko. ⁵Āwīvo ve Janerōvijā ywete pe'ite māl'ē tē ekoi. Pe'itypyte jane jaiko, jajirovija ee māl'ē kō rōmō jaiko. Pe'ite jajimōjāmoriōka ikoty rewarà kō rōmō jaiko. ⁶Janereinōgarerà pe'ite teve, a'e Janejare'e tē. Janeruu rōmō ekoi. Jane'arà kyty ekoi. Janepyterà rupi ekoi. Janepy'a pupe ekoi. Ajawy owaray tapeiko ojeeve ipyri, a'e pejē.

“Janeremikuwa kō omojikuwaoka janeupe ipi”, e'i māl'ē

⁷Kiristu iteetejē janereinō. Janeposikoa omosāi janeupe. A'evoa rē otekokuwaa ome'ē janeupe okatuaya rupi. ⁸Kee e'ipa amātejē karamoe remeve: “Oē yva kyty oo remē, watyry temimokasi e'ā kō weraa oupi. A'evo remē wemime'ēgwerà kō omosāi jane kō pè”, e'ipa amātejē ikusiwaoka karamoe remeve.^k

⁹[Kiristu pewarà mō tē aepo e'i amātejē.] Kee jaa jakuwa: “Oē yva kyty oo”, e'i remē, “Owyjy rā'ī tyvy pè”, ejaa tē aepo e'i. ¹⁰Kiristu tē owyjy tyvy kyty uu paire yvate kyty oē mijē oo. Yva 'arà kyty oē oo Janerōvijā ywete rōmō upa ky'y. Ajawy age'e remē, mape jē rōwā naikoi. Naikoi 'eteay eko e'āma.

j 4.2 Krs. 3.12-13 k 4.8 Jīg. 68.18

¹¹A'evo ekoi mǎ'ě tē wemime'ē ikatuay wete mǎ'ě omosāi jane kō pē, iteetejē janeremikuwa kō rōmō. Kee janerereko. Āmōgwerà opyteporo wemimono kō rōmō toiko kupa, eewarà tomojenu erokwa kupa. Āmōgwerà opyteporo imokasi okoty rewarà kō pē wayvu mojenuarà kō rōmō toiko kupa. Āmōgwerà opyteporo imono nokuwaive mǎe kō pē, āmō taa kō gtyty. [Omokasi kō wayvu katu tomojenu noerovijaive mǎe kō pē kupa.] Āmōgwerà opyteporo okoty rewarà kō rōvijā kō rōmō toiko kupa, toja'a ee kō kupa. Āmōgwerà opyteporo wayvu rē poromotekokuwa mǎe kō rōmō toiko kupa. A'evo 'evo janepyteporo janemotekokuwa.^l

¹²A'evo pirujē okoty rewarà kō pē emikuwa kō omosāi, toposiko katu iko kupa. Pe'itypyte rōmō jajimokasi, Jesu rē jajimo'y mǎe kō rōmō jaiko.

¹³Ajaate pirujē jane ojevo jē jaikotà, Janejare'e Ra'yry rē jajirovija mǎe kō rōmō jaikotà. Ajaate Janejare'e Ra'yry sikuwa katutà ky'y, ojevo jē. Āmē ywesō Kiristu reko janeroupatà āmē ky'y, ajaate jajimovijapa mǎ'ē vo jaiko ky'y.

¹⁴A'evo jaiko remē, ja'yry vo rōwātà jaiko ky'y. Nijajimoja'yoka'āi poromoripe mǎe kō pē ipi. “Aje ipō” nija'e'āi apijarà ayvu pē ipi. Ojimoja'yri 'ejē mǎe kō tē “aje” e'i tite ojimoripea rōmō. Na'evoi āmē jaiko. Jajimomiratupa jane. ¹⁵Aje, tijatekokuwavay Kiristu koty rewarà kō rōmō jaiko. Janejare'e ayvu aje ywete mǎ'ē rupi tijaiko. Poroauvaya rupi tijaiko. Āmē ywesō jane'y rōmō tē ekoitā.

¹⁶Iteetejē janeremikuwa kō Janejare'e omosāi janeupe, Kiristu koty rewarà kō rōmō, āwisō tijajimokasi ojeeve jajiauvay rōmō jaiko. A'evo jaiko remē, ojevo jē jajirovija ywetetā Jesu rē jaiko. Ojevo jē simokasitā āmō kō tojirovija teve ee kupa. Janepirā rē tē poromosā'āgatā tapekuwa sa'u. Kee. Iteetejē janekāgwerà. Pe'īpe'īte ikāgwerà iteetejē mǎe kō ojipy jipy ojee. A'evo Janejare'e janereinō janemokasi. [Nijanekāgwekasakai sō remē, nojipy kuwa'āi ojee kupa. Āwīvo ve jane ojevo jē nijajipyi sō Kiristu rē remē.]^m

Janereko pyaukwerà rewarà

¹⁷Ajawyi kee a'e pejē eayvukasi rōmō, Janerōvijā ywete ayvu rupi. Kiristu rekoa rupi ikō tapeiko nē. Noerovijai mǎe kō vo tapeiko e'ā ky'y. Ovo rupi teve a'e kō jipy'amogetaa kō. Manyvo jaa mō rōwā a'evo ekoi kupa. ¹⁸Notekokuwai 'eteay tesō kupa rewarà mō a'evo ekoi kupa. Ikuwa e'āte a'evo ekoi kupa. Pātōnusu rupi ekoi mǎ'ē vo 'ejē ekoi kupa. Nokuwai Janejare'e rekoa kupa. Nokuwa miti a'evoa kupa. Ojimoane'e jē kupa. Ajawyi “aje ipō” ne'i kupa. ¹⁹Ajawyi ipy'a ai wete kupa. Weko aiwerà rēgā oja'a iko kupa. Nojimosiokai teve weko aiwerà rē iko kupa ipi. Nivoi oikoa rē ywesō oja'a iko kupa.ⁿ Ojimosioka kuwasi weko aiwerà rē omājā

^l 4.11 1Kor. 12.28 ^m 4.16 Krs. 2.19 ⁿ 4.19 Oka'ua rē. Ojimomy'aa rē. Wāisō.

kupa mijã. Ojimoane'e jẽ waiwererã rẽ ajamãẽ kupa ipi. Janejare'e rekoa nokuwa tari kupa rewarã mõ a'evo ekoi teãmã kupa ipi.

²⁰ A'evo rõwã ikõ tapeiko ipi nẽ, a'e pejẽ. Kiristu reruparã mõ ikõ peiko nẽ! Pejimotekokuwavay ikõ a'evoa rẽ peiko nẽ. ²¹ Akuwa Kiristu rekoa aje ywete mãẽ rẽ pejimo'e mãẽ pejimotekokuwaoka ijupe peiko. Pejimotekokuwa ee peiko. ²² Ajawyi peneko aiwerã tapeitypypypya ikenẽ, a'epa pejẽ. Tapejirojivy e'ã aekwerã kyty. Tapejimorepeoka ywe'e tite e'ã ikõ penemimota aiwerã kõ pẽ nẽ, a'e pejẽ.^o ²³ Peneko pyaukwerã rupi tapeiko ky'y. Tapejipy'amomyauoka Janejare'e pẽ. ²⁴ Janejare'e janereinõ weruparã kõ rômõ tijaiko. A'evo ikõ tapeiko ãmẽ nẽ! ãwitõ ivo ekoi, ãwivo ve tapeiko. A'evo peiko remẽ, pejikuwatã Janejare'e ayvu aje ywete mãẽ rupiwarã kõ rômõ peiko. Ijupewarã kõ rômõ pejikuwatã. A'evoa rômõ peneinõ. Pekuwapa pirujẽ a'evoa, a'epa pejẽ rewarã mõ.^p

²⁵ Ajawyi kee a'e pejẽ. Tapewari e'ã ikõ ky'y nẽ, a'e pejẽ. Pevo mãe kõ pẽ peporegeta remẽ, aje ywete mãẽ kōrijõ tẽ tapemojenu ijupe kõ ipi. Ojevo jẽ Kiristu rẽ pejirovija mãe kõ rômõ tẽ peiko. [Pe'itypyte peiko rewarã mõ.] ²⁶ Pejimõarõ sõ ava mõ gyty remẽ, kuise'ẽ tapemomi pejimõarõa ikoty kõ. Tapejimoane'e jẽ e'ã pejimõarõa. Napepy'a pirai'ãi ãmẽ peiko ky'y. ²⁷ [Pejimõarõ puku sõ remẽ, ãjagai rōvijã pẽ tẽ pejimoaiokatã ãmẽ.] Ajawyi tapejimoãkwã e'ã ikõ ãjagai rōvijã pẽ nẽ, tojimoena e'ã pepy'a pẽ, a'e pejẽ.

²⁸ Kee a'e teve pejẽ. Imona sikaepo maekwerã awyje timona e'ã ky'y, a'e pejẽ. Toposiko katu kōrijõ ikõ omoma'e kõ repy rã rẽ nẽ. Tijewe katu oposiko. Iposikoa repykerã oytã tẽ imoma'e kõ repy rã rẽ ãmẽ. ãmõ, pevo mãẽ mõ iporijau sõ remẽ, oytã teve ipãtavõa rẽ.

²⁹ Kee a'e teve pejẽ. Peporegeta remẽ, ayvu poromoai mãẽ rupi rõwã tapeporegeta ipi. Ayvu e'eay rupi kōrijõ tẽ tapeporegeta ipi. ãmẽ tẽ peporegeta mãẽ rupi pepy'amokasitã peayvu wenu mãe kõ ipi. Ojimokasitã Jesu rẽ ojirovija ãmẽ kupa ky'y. ³⁰ Nivoi sõ peiko remẽ, Janejare'e 'Ag tẽ ijãgyoaytã pene ãmẽ. Ome'ẽma rõwã sipõkõ Janejare'e o'Ag janeupe, janepy'a pupe tojimoena? Janemosã'ãga rõwã sipõkõ o'Ag pupe? O'Ag rupi janerereko katu jẽ, ajaate kãramõ janereraatã tijaiko karuaru opyri. Ajawyi ikõ tapemoãgyo e'ã nẽ, a'e pejẽ.

³¹ ãmõ, kee a'e teve pejẽ. Awyje tapejimõarõ puku e'ã koivo kõ pẽ ky'y, a'e pejẽ. Tapejimory mijẽ ikõ pejikõ'õ ee maekwerã kõ rẽ ipi nẽ, a'e pejẽ. Tapeayvu ai e'ã teve ikõ peiko ojupe nẽ. Ikatusa rupi kōrijõ ikõ tapeporegeta ojupe ipi nẽ. Tapemojaiwe e'ã ikõ penetãrã kõ ipi nẽ. ³² Tapejiauvay ikõ peiko ojee nẽ. Tapejiporijauesa ikõ peiko ojee ipi nẽ. Kiristu omãnõ peupewarã mõ, peaiwererã repykarã mõ. Ajawyi Janejare'e "awyjepe" e'ipa peaiwererã kõ rẽ. ãwivo ve ava mõ pemoai

tite sō remē, “awyjepa” tapejē kōrijō ijupe. [Tapejimory mijē kōrijō ikō ee nē.]^q

Jesu Kiristu rekoa rupi jaiko mā'ē rewarà

5 ¹Janejare'e ākarāgwerà kō rōmō peiko ky'y, emiau kō rōmō. Ajawyi eruparà mō ikō peiko ky'y nē, a'e pejē. ²Poroauvaya rupi ikō peiko ipi nē, a'e pejē. Āwitō Kiristu janerauvay, tāwīvo peiko ipi. Kejāvōigā rōwā janerauvaya. Kiristu ojijukaoka tē tesō janeupewarà mō janerauvaya rupi. Ajawyi Janejare'e oryvay ee.

³Janejare'e kee e'i pejē ky'y: “Eupewarà kō tē āwī kō” e'i. Ajawyi kee tapeiko e'ā ky'y, a'e pejē. Tapejimomy'a e'ā ikenē, a'e pejē. Pirujē a'evoa wyi tapejireko katu. Tojimo'y e'ā pene nivoi mēe kō. Āmō, tapejitupi e'ā ikō āmō kō moma'e rē pemājā nē. Napeporegeta'āi kuwasi a'evoa rē peiko mijā. Nivoi 'ete Janejare'e pewarà kō rōmō a'evō peiko remē. ⁴Āwīvo ve ayvu jajimosioka enu mā'ē, nivoi teve. Āmō, ayvu ai, ayvu teitetea teve. Janejare'e moe'ea kōrijō tē ikatu janeupe. Penorya tapemome'u teve Janejare'e pē imoe'e ipi. ⁵Kee jaa aje ywete mā'ē. Nivoi ekoi mēe kō Janejare'e noeraa'āi wena pē opyri toiko karuaru. Ojimomy'a iko mēe kō. Osiay iko mēe kō teve. Moma'e moatya rē ywesō oja'a iko mēe kō teve. Apijarerà omoma'e kō rē ywesō oja'a ipi. Janejare'e nomoēokai o'arà kyty āmē kupa ipi. Kiristu remīgwai kō rōwā apijarerà. Ajawyi nomoigeoka'āi wena pē apijarerà kō.

⁶Āmō, kee a'e pejē. Janejare'e noerovijai mēe kō kee e'itā maevo pejē: “Orevo tapeiko”, e'itā maevo pejē. A'evō remē, “hoō” tapejē ywe'e tite e'ā ijupe kō. Tapejimoripeoka e'ā ikō ijupe kō nē. Janejare'e omomoriĵautā apijarerà. A'evō werekotā noerovijai mēe kō. ⁷Ajawyi apijarerà kō rekoa rupi ikō tapeiko tite e'ā nē, a'e pejē. ⁸A'e kō vo itōkō peiko mijā. Janerōvijā ywete rekoa rupi rōwā peiko ipi mijā. Pātōnusu rupi peiko mēe kō vo 'ejē peiko ipi mijā. Age'e ojisa katu mā'ē rupi peiko mā'ē vo peiko ipi ky'y. Ajawyi ikō a'evō tapeiko nē, Janejare'e ākarāgwerà kō rōmō, a'e pejē. ⁹Aje ywete kee jaikotā Janejare'e rekoa janeroupa remē. Jaja'a katu jane kō rē jaiko ipi. Āmō, ivo katu jaiko ipi. Aje ywete japoregeta jaiko ipi. A'evō 'evo jaiko ipi. ¹⁰Pekuwa ikō Janerōvijā ywete remimota nē. Upi ikō peiko Janejare'e morya mō ipi nē. ¹¹Tapejireko katu ikō tekou aiwerà wyi ipi nē. Āwitō moma'e ik'y'a mā'ē janoē ojisa katu mā'ē pē remē, ik'y'a mā'ē ojikuwa ipi. Āwīvo tapemojikuwaoka nivoi mēe kō aiwererà ivo peikoa rupi. ¹²Tyvija rupi ywesō nivoi mēe kō ekoi ipi. Kee e'i tite oupe kupa: “Ava nomā'ē'āi ere”, e'i tite oupe kupa ipi. “Tyvija pē tē agyvo aiko”, e'i tite oupe kupa ipi. Janōsī eko aiwererà kō momewa. ¹³⁻¹⁴[Janejare'e omojikuwaokapa manyvo opota tijaiko ipi mā'ē.] Nivoi mēe kō pē

Janejare'e remimota tijamojikuwaoka ãmẽ. ãMẽ tè ijaiwererà ojikuwatà ijupe kō. Maevo ojirovatà Janejare'e kytire ãmẽ kupa ky'y. Ajare kee eu ipi:

“Oke mã'ẽ vo 'ejẽ mã'ẽ, emã'ẽ ky'y!” eu ijupe.

“Okãjã mã'ẽ vo 'ejẽ mã'ẽ, epoera mijẽ epõ'ã!” eu teve ijupe.

“Kiristu ojikuwatà neupe”, eu.

[“Manyvo neikoa omojikuwatà neupe, upi tereiko”, eu.]

¹⁵ Ajawyi sitō tapejireko katu ikō ivo tekoua rupi tapeiko ãmẽ nẽ, a'e pejë! Ijayvu karira mãe kō vo tapeiko e'ã. Otekokuwavy mãe kō rōmō tapeiko ipi. ¹⁶ Tapeiko teitete e'ã ikō pirujẽ nẽ, a'e pejë, nivoi mãe kō mōa'ārōwã rewarà mō. ¹⁷ Ojimoja'y mãe kō rōmō tapeiko e'ã. Tapetekokuwavy jome Janerōvijã ywete remimota rupi peiko ipi.

¹⁸ Pemārãkuwaa tapemoyvypyoka e'ã ikō peka'ua pupe nẽ. Peiko teitete ai ywe'e titetã peiko, peka'uay remẽ. Janejare'e 'Ãg pẽ tapejireko katuoka penerekoarã rōmō. Ikatuay peikotã ãmẽ ky'y. ¹⁹ Tapejipy'amokasi Janerōvijã rẽ pejĩga imoe'e ipi. Janejare'e ayvu rupi tapejĩga imoe'e ipi. ãMō, Jesu tapemoe'e pejĩgarã rupi peiko ipi. ãMō, Janejare'e 'Ãg omojikuwaoka peupe mã'ẽ rupi tapejĩga imoe'e ipi. Pepy'a pupe pejĩga teve imoe'e ipi. Wãi wãisō imoe'e peiko. ²⁰ Janejare'e Jesu Kiristu Ruu janerereko katu ipi, manyvo jaiko remẽ ipi. Ajawyi penorya penerekoa rewarã pemome'u ijupe imoe'e ipi. Janerōvijã Jesu Kiristu ayvu rupi a'evu tapeiko ipi.^s

Ojirekopa mãe kō rewarã

²¹ Tapejirovija katu ikō ojevo jẽ ipi nẽ. Kiristu pemomojy rewarã mō a'evu tapeiko.

²² Imẽma mãe kō pẽ kee a'e. Pemẽnã wry kyty ikō peiko nẽ, a'e pejë. ãWitō Janerōvijã ywete wry kyty jaiko ipi, tãwĩvo peiko.^t ²³ Imẽnã werekwarã 'arã kyty tè ekoi rewarã mō tãwĩvo peiko ipi. ãWitō Kiristu jane'arã kyty ekoi, tãwĩvo. Okoty rewarã kō 'arã kyty ekoi. Janerereko katuarã rōmō ekoi teve. Jane'y rōmō tè ekoi. Jane ãmẽ jajimo'y ee mãe kō rōmō jaiko. ²⁴ Ajawyi ãwĩvo ikō tapeiko nẽ, erekwarã kō rōmō. ãWitō Kiristu ayvu rupi jaiko ikoty rewarã kō rōmō, tãwĩvo ve peiko.

²⁵ Erekwapa mãe kō pẽ teve kee a'e. Tapeauvay ikō penerekwarã kō ipi nẽ, a'e pejë. ãWitō Kiristu janerauvay okoty rewarã kō rōmō, tãwĩvo ve ikō peiko nẽ. Emã'ẽ. Kiristu janerauvay rewarã mō ojime'e ojijukaoka janerekovijarerã rōmō.^u ²⁶ Omãñõa rupi janemowaite Janejare'e koty

^r 5.16 Krs. 4.5 ^s 5.20 Krs. 3.16-17; 1Pe. 3.1 ^t 5.22 Krs. 3.18; 1Pe. 3.1 ^u 5.25 Krs. 3.19; 1Pe. 3.7

rewarà kō rōmō tijaiko. Wayvu omojikuwaoka janeupe ipi, tjaneroupa janepy'aky'a'o. ²⁷A'evo janerereko ipi, ikatuay tijaiko ovake ky'y. Nuve pe'ī'āi janeaiwererà ovake jaiko remē āmē. Ivoay jaikotà ovake. Nuve'āi 'ete nivoi mā'ē janere. ²⁸Janerauvay rewarà mō a'evo janerereko ipi. Tāwīvo ve ikō erekwapa mē kō ekoi nē. Emā'ē. Āwitō jaja'a katu janepirā rē jajimokatu ipi, tāwīvo ve erekwapa mē kō ekoi. Toja'a katu ikō werekwarà kō rē ipi nē. Werekwarà wauvay mā'ē ojiau teāmā. ²⁹⁻³⁰Nuvei noja'ai wee mā'ē. Nuvei 'ete opirā rē noja'ai mā'ē. Jaja'a katu teāmā janepirā rē ipi. Jajimi'u katu. Jajikusu katu. Jajipōanō gatu. Āwīvo ve erekwapa mē kō toja'a katu werekwarà kō rē ereko katu kō ipi. Āwitō Kiristu oja'a katu janere, ojimo'y ee mē kō rōmō, tāwīvo peiko. ³¹Ajare kee e'ī itōkō Janejare'e ikusiwaoka wayvu rōmō: *“Kwaima'e opoitā oōvijāgwerà wyi oo werekwaa mō. Awyje jē oikotā ojeve iko kupa. Pe'īpyyitepa ekoitā kupa”*, e'ī ikusiwaoka maekwerà.^v ³²Āwīvo ve Kiristu pe'īpyyitepa rōmō ekoi janereve, okoty rewarà kō rōmō. ³³Ajawyī tapeauvay penerekwarà kō, a'e pejē. Āwitō pejiauvay ipi, tāwīvo ve. Imēma mē kō teve, taperovija ikō pemēnā kō imoe'e ipi nē, a'e teve pejē.

Ijākarāgwerà kō rewarà

6 ¹Ta'yry kō pē āmē kee a'e. Tajyry kō pē kee a'e teve. Penuu kō ayvu rupi katu ikō tapeiko ipi nē. Pey ayvu rupi katu ikō tapeiko teve ipi nē. I'ete a'evo peiko remē, Janerōvijā ywete koty rewarà kō rōmō.^w ²⁻³Ajare Janejare'e kee e'ī itōkō ikusiwaoka amātejē karamoe remeve: *“Penōvijāgwerà kō tapemomojy ipi. Penuu kō. Āmō, pey kō. Ijayvukwerà rupi katu tapeiko ipi. Āmē tē ikatuay ike rupi peiko puku sa'utā āmē”*, e'ī maekwerà.^x Ajawyī pepota peiko puku remē, a'evo tapeiko, a'e pejē.

Tuu kō rewarà

⁴Āmē tuu kō pē, janey kō pē, kee a'e teve. Tapereko katu ikō peākarāgwerà kō ipi nē. Tapemotekokuwa kō ikō Janejare'e ayvu rē ipi nē, upi katu toiko kupa ipi. Ojavy kupa remē, tapemotekokuwa kō jē ipi āmē. Tapemojimōarōoka e'ā ikō peākarāgwerà kō ajamā'ē nē, a'e pejē.^y

Temīgwai rewarà

⁵Temīgwai kō pē kee a'e teve. Tapemoja'y e'ā ikō penōvijā ipi nē. Ijayvu rupi katu ikō tapeiko ipi nē. Āwitō ovake “hoō” pejē, tāwīvo ve e'ā'ā rupi peiko. Āwitō Kiristu perovija katu ipi, tāwīvo peiko. ⁶Uve mirā kō, oōvijā noerovija ywe'ei mē kō. A'e kō oōvijā rovake kōrijō tē werovija maevo sō tite ipi, “temoe'e” e'ī tite oōvijā pē ipi rewarà mō. Apykyre kyty noerovijai ijayvukwerà ajamā'ē. A'e kō vo rōwā tapeiko ikenē, a'e pejē.

^v 5.31 Jinō. 2.24 ^w 6.1 Krs. 3.20 ^x 6.2-3 Jisyry. 20.12; T.M. 5.16 ^y 6.4 Krs. 3.21

Aje ywete taperovija, pepy'a pupe. Janejare'e remimota rupi a'evo tapeiko ipi, Kiristu remígwai kō rōmō. ⁷Tapenory katu ikō peposiko ipi nē. Kee tapejē: “Ivo katu aposiko erōvijā pè remē, Erōvijā wasu Jesu oryvaytā ere āmē, erōvijā yvy pewarà pè kōrijō tē rōwā aposiko rewarà mō”, tapejē. ⁸Kee jaa rē tapeja'a. [Ivo katu japosiko janerōvijā yvy pewarà kō pè remē, Janerōvijā ywete orytà janere āmē ipi.] Aje ywete Janejare'e tē ikatu japosiko remē ikatukwerà sipyytā Janejare'e wyi epy rōmō ipi. Temígwai kō opyytā. Temígwai rōwā mae kō ve opyytā.^z

Jōvijā kō rewarà

⁹Āmō, jōvijā kō pè kee a'e teve. Āwitō, “Ikatuay ikō tapeiko penōvijā reve ipi nē”, a'e penemígwai kō pè, āwīvo ve, “Ikatuay ikō tapeiko penemígwai kō reve ipi nē”, a'e pejē. Tapeje'ēgātā e'ā ikō ijupe kō ipi nē, a'e pejē. Kee jaa rē tapeja'a ipi. Pe'ite Janerōvijā ywete. Penōvijā ywete yvapewarà, penemígwai kō Rōvijā ywete rōmō ekoi teve. A'e poromosā'āga remē, ojevo jē janemosā'āga ipi, janerekoawerà rupi katu. Ajawyi ikatuay tapeiko amātejē enoneve, a'e pejē.^a

Ājāgai rōvijā wyi jajimokasi mǎ'ē rewarà

¹⁰Kee a'e jētā pejē tapeja'a ee. Ikasiay wete Janerōvijā ywete. Ajawyi tapejimokasioka Janerovijā kasia pè peiko ipi, a'e pejē. Āmē tē pejimokasiaytā ipyri, ājāgai rōvijā wyi. ¹¹Ājāgai rōvijā opota tē janemoripe janereity ipi, Janerōvijā ywete tijarovija e'ā ipi. Āwitō āpā kō ojiapisitā janere remē, agyvotē rōwā jaa āpā kō rōvaisī ipi. Raparà jaraa ipi. Kaparu jaraa teve ipi. Āwīvo ve ājāgai rōvijā ojimokasitā janere ipi remē, agyvotē rōwā jaōvaisitā. Janejare'e remime'ēgwerà jiapisia rewarà tijaporu, janemokasia kō rōmō. Ajawyi pirujē emime'ēgwerà kō rupi tapejimokasioka, a'e pejē. ¹²Mirā rōwā ājāgai rōvijā, wemígwai kō reve. Ovo rupi teve ekoi kupa. Kejō ekoi kupa. Ija mae kō. Ājāgaiwerà kō. Uve teve ājāg yvapewarà kō, Janejare'e werōarō tite mae kō. Wāisō ekoi kupa. A'e kō ojimokasiay wete jane kō rē ipi, jōvijā ai kō rōmō. Oposiko ai wete age'e remē ivo e'āa rē iko kupa ipi, ikasiay kupa rewarà mō.^b ¹³A'e kō opota janererova Janejare'e wyi ipi. Janevote nijanekasi'āi ijupe, emígwai kō pè ve. Ajawyi jajimokasi amātejē Janejare'e remime'ēgwerà rē, janemokasia mō. Pirujē poromokasi mae kō pupe jajimokasi ipi, a'e pejē. Tijajireko katu ikō ājāgai rōvijā kasia wyi ipi nē. A'evo jajimokasi Janejare'e kasia rupi jaiko remē, āmē si jane ywesō janekasitā ājāgai rōvijā wyi. Jiapisia vo mǎ'ē opi rǎ'ī remē, jane ywesōtā iwyi. Japō'ā jētā jajimokasi.

^z 6.8 Krs. 3.22-25 ^a 6.9 Krs. 4.1; 3.25 ^b 6.12 Krs. 2.15

¹⁴Sota kō ojiaπισitā remē, ojimokatu amātejē ootā kupa ipi.^c Āwīvo ve jajimokatu amātejē ājāgai rōvijā renoneve. Janejare'e remime'ēgwerā kō rē tē jajimokasioka ipi. Kee ja'e jajimokasi rōmō ipi. Ayvu aje ywete mā'ē rupi kōrijō tē tijaporegeta ipi jajimokasi rōmō. Āmō, ivo jaiko ipi. Janejare'e rekoa rupi katu kōrijō tē jaiko ky'y. ¹⁵Āmō, Janejare'e ayvu e'eay janepy'amopiryvypy katu mā'ē tē simojenu jenu ipi. ¹⁶Āmō, ājāgai rōvijā kee e'i epe jane: “Temirovija rōwā Janejare'e”, e'i epe. Aepe e'i jane remē, nijarovija'āi ijayvu. Āmē jaovaja āmē. “Temirovija tē Janejare'e”, eu ovaja. ¹⁷Āmō, kee ja'e teve janeremikuwa rōmō ipi: “Janejare'e erereko katu ipi”, ja'e py'yi teve ipi. Aepe rē jaja'a py'yi remē, jajireko katutā ājāgai rōvijā wyi. Āmō, Janejare'e 'Āg wayvu ome'ē janeupe mā'ē tijamojenu [ājāgai rōvijā rovake] toenu ipi. A'e ywesō ikasi iwyi. ¹⁸A'evō 'evo jaiko remeve, Janejare'e pē tijaporegeta jē janemokasia rōmō ipi. Kee tija'e: “Epātāvō rejupa nekasia rupi”, tija'e ijupe jaiko. Manyvo jaiko remē, tijaporegeta ijupe jaiko ipi. I'Āg tē janemotekokuwatā tijaporegeta ijupe ipi. I'Āg, “Āwī pewarā mō eporegeta”, e'i janeupe remē upi upi, tijaporegeta ijupe ipi. Ja'ave rōwā tijaiko e'ā. Tijaporegeta py'yi Janejare'e pē jaiko ipi. Pirujē Janejare'e koty rewarā kō pewarā mō tijaporegeta py'yi ijupe ipi.

¹⁹Eupewarā mō ve tapeporegeta teve ipi, Janejare'e temotekokuwa eayvu rā kō rē aporegetatā remē. A'evō peiko remē, najimonyi'āi Janejare'e ayvu e'eay Jesu rewarā amojenu noenuive mae kō pē remē ipi. ²⁰A'e mojenuarā rōmō Jesu Kiristu emono. A'e rewarā mō age'e jimopā'āga pupe aju rā'ī. Ajawyī Janejare'e pē peporegeta remē, kee tapejē: “Pauru emokasi tojimonyi e'ā Jesu ayvu katu mojenua rē”, tapejē ijupe. I'ete najimonyi imojenua rē remē.

Kareta moawyjepaa

²¹Janejimonypa katu Tikiku tē omome'utā manyvo aiko maekwerā pejē ky'y, tapekuwa manyvo aiko. Janeretārā e'eay vo Tikiku. Janerōvijā ywete remīgwai e'eay tē a'e. Orepātāvō ywete mā'ē tē a'e.^d ²²A'e amonotā pekoty, manyvo oroiko maekwerā tomojenu pejē. Pejimokasitā enu.^e

²³Eretārā kō, kee a'e Janejare'e pē, Jesu Kiristu Ruu pē, peupewarā mō: “Emokasioka kō ipi, tipy'a piryvypy katu kupa ipi. Tojiauvay teve ojee kupa ipi. Tojirovija ywete jē nere kupa ipi”, a'e peupewarā mō. Jōvijā Jesu Kiristu pē ve aepe a'e teve. ²⁴Janejare'e tē tapenereko katu okatuaya rupi, Janerōvijā Jesu Kiristu rauparā kō rōmō. Pirujē wauparā kō toereko katu, nopi'āi auvaya wyi mae kō.

[Awyjepa eremikusiwarerā āmē ky'y.]

^c 6.14 Okō'ā ikasiay mā'ē wāpasī gatu rā'ī ipi. Oyru ātā mā'ē opypy teve ipi. Oposi'a yru ātā mā'ē. Wākāg yru ātā mā'ē teve opypy ipi. Ojiyunō maire, āpā raparā kō wyi jipijaa opyy ipi. A'evō ojireko katu āpā kō wyi, āwisō tomomarama e'ā. Āmō, marija poko ve opyy ojimokasia rōmō. ^d 6.21 J.K.R. 20.4; 2Tim. 4.12 ^e 6.22 Krs. 4.7-8